

疆
邦
華
書



客亭樂府目錄

如夢令

生查子三

浣溪沙二

霜天曉角

卜算子

垂絲釣

菩薩蠻四

好事近二

謁金門

憶秦娥二

清平樂

柳梢青三

西江月三

東坡引

鷓鴣天

小重山

蝶戀花二

水調歌頭四

水龍吟

賀新郎

客亭樂府

江陵 楊冠卿 夢錫

如夢令

滿院落花春寂。風絮一簾斜日。翠鈿曉寒輕。獨倚鞦韆無力。無力。無力。蹙破遠山愁碧。

生查子 聞鶯用竹坡韻

嬌鶯恰恰啼。過水翻回去。欲共訴芳心。故遶池邊樹。人去綺窗閒。絃斷秦箏柱。百轉聽新聲。總是傷心處。前調 忠甫持梅水仙研牋索詞

消瘦不勝寒。獨立江南路。羅襪暗生塵。不見淩波步。蘭佩解鳴璫。往事憑誰訴。一紙彩雲牋。好寄青鸞去。

前調賦湘妃鼓瑟賤湘妃泛蓮葉上有片雲擎月

瀟湘曰暮時倚棹蒹葭浦不見獨醒人愁對湘妃語
璧月送歸雲一葉蓮舟舉寶瑟奏清商波底魚龍舞
浣溪沙

洞口春深長薜蘿幽棲地僻少經過一溪新綠漲晴波
驚夢覺來啼鳥近借春□□落花多東風獨倚奈愁
何

前調大韓戶侍

銀葉香銷暑簟清枕鴛醉倚玉釵橫起來紅日半窗明
多病情懷無可柰惜花天氣惱餘醒瑤琴誰弄曉鶯
聲

霜天曉角次韻李次山提舉漁社詞

漁舟簇簇西塞山前宿
流水落紅香遠春江漲
葡萄綠
斲竹奏新曲
驚回幽夢獨卻把漁竿
遠去騎鯨背釣璜玉

卜算子秋晚集杜句弔賈傅

蒼生喘未蘇
賈筆論孤憤
文采風流今尙存
毫髮無遺恨
淒惻近長沙
地僻秋將盡
長使英雄淚滿襟
天意

高難問

垂絲釣

翠簾畫捲庭花日
影初轉酒力未醒
眉黛還斂停歌扇
背畫闌倚徧情無限
悵韶華又晚
錦鞵去後愁寬珠

袖金釧碧雲信遠難託西樓鴈空寫銀箏怨腸欲斷更落紅萬點

菩薩蠻春日呈安國舍人

飛雲障碧江天暮杏花簾幕黃昏雨翠袖怯春寒有人愁倚闌天涯芳草路目送征鴻去人遠玉關長尺書難寄將

前調春日西湖用吳監簿韻

春山愁對修眉綠春衫誰爲裁冰縠日暮倚闌干不禁煙霧寒湖邊歸去路猶記傳觴處往事等空花客心驚歲華

前調

冰肌玉襯香綃薄無言獨倚闌干角相見又還休可堪
歸去愁 碧波溪上路幾陣黃昏雨歸去斷人腸紗厨
枕簟涼

前調雪中呈李常門

玉妃夜宴瑤池冷翩然飛下霓旌影天闊水雲長風飄
舞袖香 姑山人似舊清壓紅梅瘦同凭玉闌干光搖
銀海寒

好事近代人書扇

晚起倦梳妝斜壓翠鬟雲鬢手撚花枝輒笑問青鸞音
信 繡簾慵捲玉鉤垂風箏奏餘韻燈火黃昏院落報
雕鞍人近

前調

細雨落檐花簾捲金泥紅濕樓外遠山橫翠染修眉愁
碧舊游春夢了無痕香塵暗瑤瑟憑仗青鸞飛去問
新來消息

謁金門春暮有感

傷漂泊負了花前期約寒食清明都過卻愁懷無處著
晴日柳陰池閣風絮斜穿簾幕簾外鞦韆閒綵索斷
腸人寂寞

憶秦娥雪中擁琴對梅花寓言

東風惡雪花亂舞穿簾幕穿簾幕寒侵綠綺音口口索
宮梅已破香紅萼梅妝想稱伊梳掠伊梳掠十分全

似舊時京洛

前調

雲垂幕江天雪似楊花落楊花落翠襟不暖曉寒偏覺
起來獨倚西樓角客懷無耐傷離索傷離索蠻牋欲
寄塞鴻難託

清平樂

翠團嘉樹杜宇呼春去簾捲金泥凝望處幾點紅薇香
雨等閒過了花時殷勤來問酴醾恰有一枝春在畫
樓紅日林西

柳梢青

紅藥翻堦天香國豔輝映樓臺解語渾如三千粉黛十

二金釵 青鞋踏破蒼苔趁舞蝶遊蜂去來宿粉偷香也應難似年少情懷

前調詠鴛鴦菊雙心而白秋晚始開

金蕊飄殘江城秋晚月冷霜寒一種幽芳雕冰鏤玉舞鳳翔鸞悠然靜對南山笑瓊沼鴛鴦飛翠瀾小玉驚呼太真嬌困俯檻慵看

前調爲丁明仲紀夢

歸夢迢迢分明曾見舞徧雲韶解道相思愁寬金釧瘦損宮腰覺來情緒無聊正戍角聲翻麗譙楚塞山長巫陽人遠斗帳香消

西江月秋晚白菊叢開有傲視冰霜之興李漁社賦長

短句云若將花卉論行藏盍在淩煙閣上因次

其韻

妙墨龍蛇飛動新詞雪月交光論文齒頰帶冰霜鳳閣
從來宮樣壽菊叢開三徑清姿高壓羣芳折花聊爾
問行藏會見橫飛直上

前調

羅襪浪傳仙子宮梅休寫華光人言壽客飽經霜不趁
凡花入樣萬玉森羅素節一枝賸有餘芳孤高肯使
蝶蜂藏特立甘泉頂上

前調詠黃菊

昨夢鈞天帝所曾陪奏賦明光玉除金蕊映秋霜盡道

宮花別樣 嬌額塗黃牢就金蓮襯步齊芳舞鸞儀鳳
巧難藏羞殺繁紅陌上

東坡引歲癸口季秋二十六日夜夢至一亭子榜曰朝

雲見二少年公子云久誦公樂章願得從容笑
語因舉似離筵舊作稱贊久之余謝不能公子
拂然不樂命小吏呼妹麗十數輩至圍一方臺
而立相與羣唱聲甚淒楚俄頃歌者取金花青
牋所書詞展於臺上熟視字畫乃余作也讀未
竟一歌者從旁攫取詞置袖中舉酒相勞苦云
釵分金半股之句朝夕誦之胡爲念不及此耶
公子云左驗如此奚事多遜抵掌一笑而寤恍

然不曉所謂戲用其語綴東坡引歌之

綠波芳草路別離記南浦香雲翦贈青絲縷釵分金半
股釵分金半股陽關一曲聲淒楚惹起離筵愁緒夢
魂擬逐征鴻去行雲無定據行雲無定據

鷓鴣天六韻寶溪探梅未放

歲月如駟烏兔飛情懷著酒強支持經年不見宮妝面
穠碧誰斟翡翠卮江路晚夕陽低奚奴空負錦囊歸
欲憑驛使傳芳信未放東風第一枝

小重山

一笑回眸百媚生嬌羞佯不語豔波橫緩移蓮步繞堦
行疑情久幽怨託銀箏些事那回曾水晶雙枕冷簾

紋平窺人燕子苦無情驚夢斷何處覓雲行

蝶戀花

次張俊臣韻

舞處曾看花滿面獨倚東風往事思量徧
綠怨紅愁春不管天涯芳草人腸斷
一紙雲牋魚雁遠歸鳳求凰
誰識琴心怨臂枕香消眉黛斂也應爲我寬金釧

前調

月冷花寒宮漏促人在虛檐玉體溫無粟絃斷鸞膠還
再續嬌雲時霎情難足
解道雙鴛愁獨宿宿翠偎紅
蛺蝶元相逐蓬海路遙天六六終須伴我騎黃鵠

水調歌頭

春日舟行

春漲一篙綠江闊暮濤寒龍驤萬斛飛舉鯨飲酒杯寬

醉倚柁樓清嘯目送孤鴻杳靄景意與俱閒恍若馭風
去蓬島舊家山記吾廬環翠竹拱蒼官碧雲信杳誰
爲日日報平安桂棹桃溪歸後流水落紅香寂春事想
闌珊賴有錦囊句寫向此中看

前調贈維揚夏中玉

形勝訪淮楚騎鶴到揚州春風十里簾幕香靄小紅樓
樓外長江今古誰是濟川舟楫煙浪拍天浮喜見紫芝
宇儒雅更風流氣吞虹才倚馬爛銀鉤功名年少餘
事雕鶚幾橫秋行演絲綸天上環倚玉皇香案仙袂揖
浮世落筆驚風雨潤色煥皇猷

前調次吳斗南登雲海亭

年少青雲客懷抱百憂寬北窗醉臥春曉歸夢趁吳帆
來訪鴟夷仙迹極目平湖煙浪萬象一毫端雲海渺空
闊咫尺是蓬山佩飛霞囊古錦幾憑闌赤城應有居
士鳳舉更龍蟠待向玉霄東望相與神遊八極身未似
雲閒長劒倚天外功業鏡頻看

前調歸自羅浮舟過于湖哭張安國至采石弔李謫仙
悼今昔二賢豪之不復見也月夜酹酒江濱慨然
而去作長短句

曳杖羅浮去遶鶴正南翔青鸞爲報消息巖壑久相望
無奈漁溪欸乃喚起蘋洲昨夢風雨趁歸航萬里家何
許天闊水雲長歷五湖轉湘楚下三江興亡千古餘

恨收拾付詩囊重到然犀磯渚不見騎鯨仙子客意轉
淒涼舉酒酌江月襟袖淚淋浪

水龍吟金陵作

渡江天馬龍飛翠華小駐興王地石城鍾阜雄依天塹
鼎安神器鳩鵲樓高建章宮闕玉繩低墜望鬱蔥佳氣
非煙非霧方呈瑞璇霄際貔虎雲屯羽衛壯金湯更
隆國勢天驕膽落狼烽晝熄玉門晏閉祇謁陵園長安
口遠中興可冀笑六朝舊事空隨流水千古恨無人記
賀新郎秋日乘風過垂虹時與一羽士俱因泛言弱水

蓬萊之勝旁有溪童具能歌張仲宗目盡青天
等句音韻洪暢聽之慨然戲用仲宗韻呈張君